



MARAMAN – PAISATGE CULTURAL DES VALADAS MAIRA E GRANA

Continua la terça edicion del ric programa “*Maraman – paisatge cultural des valadas Maira e Grana – 2018/2019*” ente lhi musèus e las exposicions des doas valadas presenten al public de propòstas culturalas, rescontres, film, laboratòris.

Sande 23 de febrìer del 2019 a 20.30 oras a Sant Ròc de Bernés (via Divisione Cuneense 65) l’**Exposicion de Fòssils** proponarè una serada dediaa al **GEO-TORISME EN VAL MAIRA**. La particularitat geologica d’la Val Maira es èsser traversaa da tuchi lhi terrens d’un antic ocean alpin, dich Tetide. Aquò pòrta a una varietat de ròchas que laisson lor peaa enti panoramas e las combas que l’atraverson: lhi bolets de peira di Chichos del Vilar, lhi contrafòrts del Rocharè, lo Viòl di Ciclamins, lhi preits de Celas, lhi precipicis del valon d’Elva, la muraha del Quersònh e del Pelvo, lo Patrimòni Geològic Italian d’la Gardeta abo siei rectils triassics, las Trunas de travertin a las Sorças del Maira, las agulhas del grop Chastèl-Provençala e lo Pissalh d’Estròpia. Lo torisme de l’outdoor es liat a la geologia, e serè explicat lo perquè. Drant de la conferença del geòlog **Enrico Collo**, visita guidaa a l’exposicion di fòssils del musèu a cura de **Attilio Dalmasso**. Intrada libra, **prenotacions** tel. 0171 687207, email attiliodalmasso@tiscali.it

Sande 2 de març del 2019 a 15 oras a Sen Pie l’**Ecomusèu Terra del Chastelmanh e La Cevitou** proponarèn ental Salon Pensionat Casa Vittoria **LAS FANTINAS**. A Sen Pie en Val Grana, fins a la fin de lhi ans Quaranta per Carlevar las mainaas en masquera proponion un pichòt spectacle itinerant: las *tres fantinas*, lo chant dialogat d’*la poma d’amor*. A setanta ans da la darriera rapresentacion, gracias a la disponibilitat di testimònis e a la precisa e preciosa racòlta des testimonianças sal territòri facha da **Lombardo Renato**, es estat possible arproponer la chançon scenetjaa. L’espectacle serè enterpretat da las mainaas de **Sén Pie**, companhaas dal còro d’la **Cevitou**.

Lo programa continuarè a març abo lo Centre Europèu Giovanni Giolitti, lo Musèu occitan Sòn de Lengua – Espaci Occitan, la Colleccion instruments musicals “G. Goletti”.

Se continuarè puèi fins a junh abo tuchi lhi autres musèus Maraman: lo programa complet se pòl leser sal sito www.espaci-occitan.org. Lo calendari de rescontres, curat dai musèus e coordinat da Espaci Occitan en collaboracion abo l’Union Montana Val Maira, es realizat abo l’ajut d’la Region Piemont, e rapresenta decò una des accions d’la Carta Europea del Torisme Sostenible del Viso. Per informacions: Espaci Occitan de Draonier, tel 0171 904075, segreteria@espaci-occitan.org, Fb [@museooccitano](https://www.facebook.com/museooccitano), Tw [@espacioccitan](https://twitter.com/espacioccitan).